

四庫全書

集部

欽定四庫全書

集部

澹齋集卷八

詳校官左中允_臣瑋五珠

主事_臣呂雲棟覆勘

謄錄貢生_臣吳壽康

謄錄監生_臣張曾壇

欽定四庫全書

澹齋集卷七

宋 李流謙 撰

七言律詩

譙允蹈知縣和予所作二詩復用韻答之

向來沮洳懶扶竿，獨有詩情久未闌。
把菊風流元曠蕩，紉蘭氣骨自辛酸。
賞音定許推夔足，知味寧論食馬肝。
勝日從公窺祕藏，珠星璧月照人寒。

窮年斗粟亦時須，清坐那能論有無。
洗我破樽傾竹葉，

覓君佳句寫桃符種瓜晚計應先定畫餅空名不擬沽
辦取芒鞋山裏去羊腸縱險是夷途

次大人韻二首

盤礴誰知畫史真向來唯有宋元君試除學道有底事
為問決科何等文綦罷玉杵收碎電香殘金鴨轉微雲
獨騎一馬悠悠去閒訪江頭白鷺羣

六品官資巨厭卑高懷自不入時宜却尋清渭歸垂釣
猶向釣天憶射麋長日只憑詩遣悶暮年全藉酒扶衰

早將鵬賦胷中了賈誼何憂絳灌疑

又次大人韻

卜築城南幾歲華
滿川煙雨富桑麻
武陵未用逃秦俗
盤谷從來屬李家
橫拓小溪通畫檝
剗栽疎竹間梅花
更饒一斗詩千首
不信閒居樂可涯

遊安樂次句龍元應韻

得友何妨並轡行
眼明木末數峯橫
真游與世寥寥隔
滯念逢僧稍稍平
不復定身懷故宅
空餘遺像闕荒坑

莫教學道傷遲暮世路低回已半生

次元尉伯言韻

燭影紅餘燄屢更不知飛霰集前榮終年客有刀頭恨
半夜春從酒面生華髮風埃羞漫仕廢疇煙雨負深耕
誦君好句迎新歲更醉屠酥最後觥

譙丈復見貽仍次韻答之二首

筆陣旗開豹繞竿敢持一鏃傍門闌竭來戲作鳬飛鳥
老去嫌為蚋聚酸塵土簿書慵掛眼瓊瑤文字喜彫肝

寄牋閭闔誰相問九虎近人毛骨寒

只得公詩百不須萬金人有此應無可容輕易秦庭璧
已戒牢藏晉鄙符慣客鳬鷗迎野步及時菰韭薦村沽
幽棲為問能來否朝市山林自兩途

再賡佳什已致牽羊之請又辱不鄙垂教蓋大
巫困小巫欲眎其顛踣為戲耳輒作二章以
足小成之數

鱗鱗新綠漲篙竿飛鴈聲中歲已闌梅蘂尚能供冷淡

酒杯那復問甜酸徵招不入幽人夢節物空驚壯士肝
趁取芳菲行樂去麗詞妍唱暖春寒

講摩師友我尤須此道今人已絕無頗欲相從問奇字
故應未暇注陰符竹嫌影薄乘春種酒怕樽空帶雪沽
杖屨往來憂不數恐公早晚躡華途

宇文德濟約游崇慶值客不果從德濟有詩次

韻二首

午枕風輕睡足時起來閒掩竹間扉登山劇欲君聯臂

出戶那堪客挽衣失脚半生沈世網掀髯一笑見天機
青山好去應須去遽瑗于今已覺非

跨海仙人安在哉幽尋款款不須催雲蘿有約遽相失
杖屨幾時能獨來半日清談容易廢百年幽抱若為開
新詩小慰參差恨快讀聊將勸一杯

次韻楊師仁見贈

鴻鴈行中接俊游不將千戶比荊州自于種種推先手
可但區區放一頭揚馬不妨生絕代鄒枚未肯老諸侯

天寒翠袖愁如織應念塵侵季子裘

師仁再用韻復作一首

室中元自有天游海內如何止九州
送老只憑書萬卷傳家不用橘千頭
便當野服從逋客未暇巍冠伴沐猴
一動天文兒戲耳苦煩天子訪羊裘

王正卿何道夫和嘉字韻詩至數十道夫贈予
數篇晉卿亦贈一篇因次其韻凡六首

從君未省涉津涯白壁明珠屢拜嘉
一吸湖江真大國

僅除風雨亦寒家簿書笑我忙官事筆硯饒君管物華
世味可能爭腊毒餒蛟饒兇漫搖牙

放浪山顛與水涯藜羹有味薦珍嘉根塵要識元非我
言語懸知未到家霜渚澄波空漲潦風林脫木淨浮華
公明領取休論價處事何須更作牙

清言元論極邊涯南渡風流繼永嘉中散一生慵作吏
淵明無日不思家悠悠官路降曾臆苒苒年光侮鬢華
人說亂蛙勝鼓吹欲將藜杖比高牙

戲論無涯與有涯委心沖漠固清嘉衣裳草木元非織
窟宅雲霞豈是家瞪眎恐同高長史神交宜伴老南華
只應一念超塵劫安用神漿夜繞牙

道夫問予
求妙通像

越王飛觀挿天涯小異何人識孟嘉別後文章尤造理
向來學術自成家諸生薦士皆時論此道逢辰固國華
行脫羈銜謝拘迫雲窻歸理萬籤牙

贈晉
卿

洗甲傾河漸可涯北征猶記宋元嘉石劉姓字非圖錄
軒轡乾坤自我家原上鼓旗寒朔吹日邊詔令挾春華

舞干元是吾皇事不必將軍號虎牙

樞相游吳園再用前韻

等閒驅雪作晴天夾道從公立萬峯白甚自矜梅淡好
青回稍覺麥芊綿不知今夕真何夕共說明年是好年
舐鼎恐無雞犬分一江還我捕魚船

任德廣通判拉游長松以詩見貽次其韻

稽首頭陀問八還揚眉應已破元關苦無骨相侯千戶
薄有生涯屋數間笑讀道書蒙絳帕喜澆茗椀酌青山

從公一辨薰知見谷霧無心澤豹斑

鷺行駕列幾時還虎豹何曾限九關
雜沓羣公半天上
婆娑老子但塵間
平戎正倚二三策
招隱休論大小山
渥水斷崖磨欲盡
憑君染筆續彪斑

已成倦鳥不知還碌碌無奇合抱關
五斗未供雞鶩飽
一身長占簿書間
何妨使我留東閣
久自從公仰泰山
佳句傳來渾含喜
亟將病目洗瀾斑

德廣至中途再示詩次其韻

肩輿又作帶星還騎氣遙瞻晚度關已覺勝游同夢裏
不知秀色尚眉間鞭鯨浪欲浮滄海賣鶴猶堪買好山
幾日褰衣扣黃閣雲腴重試鷓鴣斑

次子友竿字韻

百戰殘兵但揭竿每聞風鶴意先闌懷中鼠腊元非璞
味外鹽梅不止酸細讀知君應掩口苦吟笑我已剗肝
中天赫日臨無際一點螢飛宿草寒

次韻仲甄見貽

向來出處有心期未厭雲霄戢翼飛留滯兼旬空悵望
逡巡半路偶同歸却欣夜語仍連榻尚憶朝回日典衣
里閑齊年班又接世間如我與君希

長蘆次德茂韻

捲雪竒觀千丈瀾詩情撩動未應慳却收浙右三年夢
仍對淮南數尺山靴板隨人元自漫田園覓去正須閒
風檣獨立看飛燕家在孤雲落照間

送馮夏卿

再見三池已舊遊
向來交臂錦江頭
味融實際冰河泮
心印微言水月秋
雖作燕鴻猶邂逅
故應蓬梗合漂浮
相思別後才餘夢
身在刀州望梓州

有感

眼看燕雀鬧雲間
塌翼蓬榛笑孔鸞
未暇持竿釣渭水
却因採菊見南山
床頭有酒三冬足
案上無書一日閒
世路只今難着脚
定當何地置疎頑

飲文氏園是日鵲噪于庭坐上燭花無數就試

者凡五人

虎變龍騰各有心諸公高宴盍朋簪爛開數對迎祥燭
合噪仍來報喜禽人似月娥元自近酒名天祿莫辭深
坐中五客聯登去他日華堂榜桂林

次韻陳彥博梅飲之什

又向疎梅檢校春乾坤浩蕩日趨新一樽樹下喚深酌
數歲天涯思遠人正倚交情論晚暮直因臭味作疎親
淵明嗜酒嵇康懶只覺年來此是真

送李閬州二首

耳熟才名四十年，憂民憂國兩華顛。
不妨銅竹仍三剖，要是金門竟九遷。
連歲爐錘專造化，諸生歧路託飛騫。
餘丹乞與閒雞犬，亦許身隨絳闕僊。

少陵曾賦閬州詩，苦說城南天下稀。
鈴閣訟閒簾半卷，胡床客好塵頻揮。
著鞭尚及春耕勸，促詔應隨曉仗歸。
他日遺簪猶在念，端容杖策扣黃扉。

再用魏城驛韻貽白綿州

多病相如故倦游歸逢清潤麥天秋回頭漸遠將軍幕
飛夢先登帝子樓磊落聲稱元古郡醉吟家世自詩流
此身只擬春中老莫問君平住益州

貽白綿州

曾陪芍藥醉春風轉首三年似夢中誰使衝泥千里去
又欣剪燭一樽同名章越好供妍唱舊學全疎愧近功
莫怪分符少留滯此邦曾客少陵翁

寄送張雅州二首

融和盎盎上雙眉
曠度真成萬頃陂
岱華自高元地勢
球琳不琢本天姿
地方千里我無事
春滿萬家人不知
預作去思無限意
攀轅送處似迎時

二年學舍冷如冰
爰業龍門許屢登
可但不遭官長罵
只應獨愧小人乘
身留紫塞天一角
目斷朱輪山幾層
為問何時到牆仞
清宵遠夢故堪憑

七夕馬逸已而獲之

門外喧呼驚失馬
天邊未暇問牽牛
報恩不作雀銜玉

快意遂為鷹脫鞴他日蓋惟吾已許暮年繩勒汝應羞
故知多憶橫門道定厭青絲久絡頭

送魏德源倅永康

晚歲從誰覓賞音浪將孤興託瑤琴聊為風月平分客
莫起山林獨往心碧草但能供別恨黃花却解勸清斟
我猶未制思親淚更聽離歌定不禁

別趙惟直

邂逅都城一笑休却來萬里共羈游關河地迴仍分首

桃李春深已放舟詩卷長留開倦目酒杯盡嚼豁離憂
追風健筆兼豪氣期子蓬山更上頭

秋懷次黃仲甄韻

畏日全無客到門一溪閒與白鷗分遶樓山色時時見
抱葉蟬聲處處聞戰罷碁枰無宿恨夢回茗椀有殊勲
力田尚可持門戶我欲歸耕谷口雲

破曉庭皋一葉風年華冉冉笑羈窮獨攜拄杖行溪曲
恐有桴音出葦叢世界大千塵偶集人生三十日方中

只須飽飯隨緣過，增繳何曾到塞鴻。

喜晴

一秋今日是新晴，晚稻懸知有幾分。
抱濕庭蕪猶靡靡，傍暄溪卉欲欣欣。
風料理丹楓樹，返照留連白鷺羣。
搖落只供騷客恨，故應長倚醉醺醺。

重陽偶成

百尺危樓倚瘦藤，輕陰小令正秋深。
山雲洗刷供晴眺，杯酒飄浮笑淺斟。
漠北烽煙空抵掌，水南松竹每經心。

紅萸紫菊誇強健醉帽無人獨自簪

宿高橋懷仲明

闌干投晚俯煙霏全不支梧酒力微沙鳥犯寒猶獨立
林鳥趁暝已先歸繚愁亦笑溪為帶障遠端疑樹合圍
歲晏客天無好夢最憐清露漬人衣

太平宮

一馬騰騰上翠微松風瑟瑟解吹衣故宮亂後仍華壯
使者年來果是非何日身能繡藥笈只今心自託金微

兩林不到猶遺恨落照銜山勸客歸

送家連父解縣竹丞

猿臂將軍數自奇白頭州縣竟何為
斷塹未盡成風巧測管才窺澤霧姿
流水繞除空日日西山拄笏謾時時
一杯相送貧無力剩有新詩說去思

送計祖仁雒縣丞

青青楊柳灞橋斜滿酌清樽莫嘆嗟
可是因循成別緒只應咫尺便天涯
未論流水千竿竹且看春風一縣花

渺渺故園情最苦不知歸夢屬誰家

次韻彥博中秋不見月

露華浸竹冷娟娟想象嫦娥能少年萬事只堪搔短髮
一杯不擬問高天駸駸夜色投書幌的的心期在釣船
可笑薄雲工料理何曾遮却一分圓

學中曝御書次少虞韻

晴暉煜煜晨光洗眼來窺雲漢章身拜玉階元夕夢
手披金笈有天香風翔鳳翼尤妍媚雲捲奎躔不覆藏

尚想承平閒氣象從臣鵠立侍君王

李花

春寒怪底一分加元是東君雪作花已後殘梅矜夜魄
強隨飛絮舞朝霞霜葩薦葦何人共碧實堆盤儘客誇
為汝泣然應有意騷人端是感年華

井上即事

九陌黃塵浣客裾隨人亦恐到茅廬朝朝山色供憑檻
夜夜溪聲伴讀書可要功名驚宇宙分知骨相合樵漁

晚來小艇衝煙出江上有人爭賣魚

挽郭敦復

太少城中斂板初識公鸞鵠自清癯持心要是忠厚者
遇事決非章句儒豺豹欲前終落爪參辰無地可彎弧
他年白鶴同歸否猶有髯龍老未枯

送王和叟赴果州

芝蘭祇合在階庭公子翩翩更老成白日朱門三列戟
黑頭華轂再專城一樽別酌心先醉萬里歸橈夢易驚

欲問樓高高幾許跨渠僊鶴到瑤京

晚飲趙惟直以果薦知所從來酌以一大杯

猶帶枝頭淡淡黃飽經十月洞庭霜且傾蜀客千杯酒
頗記吳姬三日香可得一餐逢玉屑故應百感為瓊漿
此江幸自東流去何不和根移取將

送張子勤九隴尉

老鳳高棲雛鳳飛山林鍾鼎各相宜出門馬首亭亭去
斂板胷中落落奇頗憶濁醪過我夜正愁碧草送君時

如何數日中年味恰是今朝聞子規

貽長松寺慈禪師

一年山色好相看欲去仍來倍黯然大士初無留客意
幽人更結住山緣梨花村落清明後梅子園林五月前
我已到家春亦老酒杯猶足趁流年

用宇文龍圖韻贈龍華印老

少年一口吸西江聖處端能走季咸淨觀清冷橫一水
遠懷孤秀揖千巖溪雲卧久看頻度山日談餘訝半銜

便欲瘦筇來問訊上方應恐隔僊凡

再用韻送印老

抖擻孤懷十日談不將幽憤託巫咸
別來斷鴈虛秋信夢破驚猿憶曉巖
脫葉趁風聲互答歸鴉赴日影相銜
臨分半偈無多惜濁骨憑師為點凡

挽楊彥序

長憶君家得雋多庭前桂樹想婆娑
岱雲觸石才膚寸溟浸稽天但一波
頗欲馳韉觀縱擊可堪伏櫪起悲歌

人生泡焰都難據惟有豐碑屹不磨

閨重陽有感次宋景文公韻

濛濛煙雨濕閒愁往燕來鴻共遠遊
引滿白醪欣再熟儘開黃菊耐深秋
眼前節物重憑檻醉裏商歌緩擊甌
苦愛佳名歎塵爵淵明高興轉悠悠

寄李仲明

夜床風雨憶相過節物驚人奈老何
只有孤鴻知我意每因明月為君歌
千山夢去無由到一字書來已覺多

餘耳向來真義合不知底處便容戈

寄劉德父

解攜仍是一年餘本自情親聽迹踈子去合登青瑣闥
人言方駕短轅車向來花月空餘夢近日詩文定起予
塞鴈若知懷遠意寄書聊為問何如

別費檢正二首

香案前頭自乞歸歸心先逐鴈西飛豈關松菊吾身重
偶託蓴鱸此意微行樂不妨千騎擁照人何必萬釘圍

兒曹悵惜先生笑付與醇醪定是非

主人愛客客留連敢比荊州遇仲宣親奉綺談逾十日
空勞清夢隔三年未能輕去田園樂那得長居几杖前
真約賞音無幾箇故應感激易潜然

桃花

自然穠臉與深唇一味繁紅也絕倫滄海浪傳千歲種
武陵應有四時春去年崔護詩仍在前度劉郎意獨親
亦要清樽相料理可能但倚筆如神

即事

寒食已過風日好城郭稍背郊原幽雙扉晝閉亦何事
一杖攜春仍浪游但覺桃花成老大不知楊柳尚風流
霜螯蠓蟻君須醉細雨疎簾罷遣愁

游野航次元應韻三首

平地坐我帆檣中翠峯出沒工為容輕鷗舞晴沙照影
蒼蛟吼浪雪薄胷漁舸繫月江一曲樵斧斫雲山幾重
詩翁忽來吐佳句物色才情元一宗

日落未落空明中琉璃夜色開天容一江不浣清淨目
百榼能平硯磊胷神山在前若可到江妃去人無數重
錦袍酌酒醉起舞跨鯨僊人乃吾宗

掛起西窻橫笛中白鷺亦有佳客容江風脫幘吹短髮
明月入戶窺愁胷只須茅茨補疎漏安用樓觀相複重
人生趣尚各天性古人願識韓朝宗

遣興

不於蝸角更稱兵放下諸緣即太平但有千篇足傳世

不須二頃可謀生盤飧麤糲聖賢事門巷蕭條千古情
緩炷爐熏引輕吹道人心念一絲橫

邂逅成功一世驚不知元逐衆人耕結茅容我庇風雨
識字教兒記姓名閒輒吟詩真苦相醉能遣客即真情
晚來溪月延微步浴鷺浮鷗俱眼明

脩脩楊柳倚門斜客至遙疑靖節家半世功名閒日月
百年生理仰桑麻只知上將元屠狗不信通侯亦種瓜
靜想升沉堪一笑清樽且趁未殘花

向來穴紙笑癡蠅猶覺文章是小乘
四壁圖書聊隱几
半窻風雨屢挑燈
卑枝早厭鳴岡鳳
尺水難留跨海鵬
未試屠龍一分手
可能問舍愧陳登

疎疎簾色映蒼苔
屋角諸峯曉翠開
蝶護殘花癡不去
鳥爭餘食慣仍來
向來棲遁初無意
從古經綸別有才
抱杖風前一長嘯
破愁安得即時杯

小窻日影轉悠悠
卷盡殘書却到頭
香茗半甌輕列鼎
好詩千首勝封侯
朱絃無復人三歎
白壁空慙我屢投

酒好但宜供客醉癡兒可忍換涼州

楚客近添蘭九畹渭川新長竹千尋巨堪多病侵豪氣
猶喜長閒契宿心滿眼圖書吾事定杜門香火佛緣深
海波倒立風霆峻未省鱣鯨竟陸沉

欽定四庫全書

澹齋集卷八

宋 李流謙 撰

五言絕句詩

江月二首

秋江與秋月誰遣恰相和
借我蓑衣著三人亦未多
皎皎映澄漪千尋沒到時
篙師輕轉櫓可惜碧琉璃

姚和中母夫人年八十二殊增獨無之嘆因遺

小兒使歸為壽副以一絕

舍肉增長嘆分甘助淺斟贈君椒栢酒慰我蓼莪心

長灘

乍脫驚濤恐猶為曲木看昔人憎勝母吾亦畏長灘

雲莊耕者

莘野樂堯舜谷口豈真卿自是不可掩區區非近名

過東州境見耕

驅牛耕側坡牛困人柰何我念田家苦東州苦更多

六言絕句詩

偶題

小溝溶漾可涉彩舫夷猶不驚晚酌忽逢名酒當時打
破愁城

遙岑數寸斜日楊柳一江晚烟追恨風拘雨阻那知鴈
後花前

關王祠

諸葛張陳已上將軍未數黥韓瞑夜險途風雨令人懸
想辛酸

萬人傑誰可敵千載名終不磨此地晚鍾晨梵生前鐵
馬金戈

七言絕句詩

先公三池祠室學官相傳占為公署同年李南
才毅然欲復其舊貽以四絕句

老僊有力在斯文廩士餘糧但一塵列屋誦絃知所自
杏壇今秀幾株春

末俗何由到古人傷心祠室漫名存風懷雨棟那堪說

石刻汗漫像設昏

一椽不得留遺愛百世寧能保奉嘗豚犢無稱益先美
碎碑伐樹亦尋常

一念愛親無彼此向來情義篤年家稍伸九地幽幽恨
此事期君可咄嗟

次韻嘲落梅代梅答二絕

不是春愁減素肌從來鶴骨可能肥便將夢裏一般看
恐是幽人作蝶飛

吹開吹落本無心萬物自秋還自春若把穠花校枯寂
本無諸妄亦無真

彥博歸自劔陽其家梅已半落作詩見示因次

其韻

為問春從何處歸晚村烟雨細絲絲從來漏洩寃庭柳
點檢分明是此枝

杜詩云漏洩春光
是柳條

溪水泠泠欲雪天風鬟霧鬢不勝寒定同子美鄜州月
應恨閨中只獨看

愛惜濃香恐過時
劉郎何事苦歸遲
只應昨夜幽窗夢
飛到君邊未可知

梅花

昨夜臨溪一樹開
人言應與鴈俱回
霜葩只在寒梢上
却是春風自去來

殷勤蝶障與蜂遮
一點幽香不許賒
歲歲相逢只如此
問花羞我我羞花

照影月斜寒瀨淺
吹香風細夜簾疎
萼綠華來誰得見

借君雲珮與霞裾

似嫌潔白太清寒故着微紅
墨破顏俯仰聊同閒草木
不妨遊戲住人間

道人一味着幽禪誰遣天花
到眼邊亂插銅鉗看盡日
向人終是好因緣

戲贈智淵師二偈

芙渠元不植高原插向紅爐
色更鮮拖取門前擔糞漢
滿堂金玉富熏天

江北江南喧世界陪了草鞋多少錢嚇得小兒成底事

何如參我竹匕禪

師嘗為伍伯捨緣

有以狀元紅牡丹見遺戲作一絕

含笑嫣然燦曉霞龍頭一種絕諸家東風有意憐枯枿
乞與佳名不乞花

海棠

十二仙人玉琢欄帶晴帶雨總宜看東君不許尋常見
可忍狂風滿地殘

二月十七日同子友過宇文氏莊觀海棠二絕
漸老花羞人不羞枉因風雨結春愁意行忽欲江東去
錦帳三分半未收

長橋納納裊東風倒射斜陽千丈紅晚色自佳人不見
青山翠霧碧波中

信口十絕

細雨蕭蕭懶出門爐薰消盡有餘溫案頭不著閒文字
時把楞嚴信手翻

縛虎斷蛟空有意毀車殺馬且偷閒憑君呼我為居士
一味臨流與看山

漫說昭君第一人羶車萬里託羌渾君王下詔求傾國
不為琵琶略斷魂

只須終日醉騰騰冷看榮枯本不曾蟻子側坡逢白雨
婁羅與鈍兩無憑

山僧三十尚童烏危坐相看一語無沸鼎可憐魚欲爛
不知眼底着冰壺

園林換葉日初長竹閣蓮塘意思涼除却種花并釀酒
更無一事可思量

庭前幽草何人種又是緣階數尺長主管風光元要此
可憐魏紫與姚黃

早眠晏起從疎懶醉舞狂歌任性靈丈八蛇矛胸次著
人言屈子愧劉伶

慕陶徵君吾本意我亦能耕妻肯鋤贏得少年腰脚健
芒鞋却自勝肩輿

獻玉遭刖我自笑因黥得封人未量百年相勸但飽飯
從渠蟻穴自侯王

絕句

圍爐獨擁夜深紅已是摧頽一老翁斷簡半披還半掩
如今不作蠹書蟲

霜乾木脫氣堅明病骨驚寒亦强行折得梅花全未吐
不應於我尚含情

口占

午照當窻樹影疎靜聽瀼瀼水鳴除便將一日平分
半用酣眠半讀書

予客三池王正卿以四絕見寄次其韻

山房鏤劒滋生塵獨鶴沙邊久念羣我有好詩誰畫得
一江殘照數峯雲

夢中行盡好山川照水征鴻影自寒若向紫巖樓上過
為傳片紙報平安

佳人望斷日平西可意相逢眼底稀漫說携家終是客

開愁唯有醉淋衣

我來在處說君名小軸人爭睹鳳皇放却他時能致此
定知阮眼為君青

薛公肅訪山中偶出不值公肅留詩次其韻

一舸初從帝所還綵衣照日眩爛斑今君已出雲天近
我尚無錢可買山

紫極朝歸謝往還新篇落筆爛彪斑烏藤拈起都閒事
且看西湖處處山

再次才夫韻二絕

燈窗仍有卷披黃
此地重來似故鄉
安得清江都是酒
勝金滿屋笏堆床

木生殊不願青黃
雨露根深無有鄉
臺省從渠登衮衮
未妨老子卧胡床

譙令以眎堰絕句見示次其韻

疲氓糠覈自能肥
一箇何曾吏扣扉
鳳指翠梧求友集
蝗無綠野蔽天飛

我瘠不妨天下肥期公他日到黃扉憫農一念通精稷
定遣驚雷霹靂飛

次韻立春後餘寒二首

挾冷朝陽未吐光小池猶有夜來霜東君自識沈潛意
誰道陰柔解變剛

絳帳何時得罷開為君嘆息首空回亦知彈鋏無人聽
收拾清詩分付梅

次黃仲甄峽中韻二絕

衆流自作一門去老子閒為三峽游弭棹初逢雲雨館
轉帆便是帝王州

連日舟橫拍岸風祇應身世在疎篷旅床獨蠶皆愁緒
青鏡明朝即老翁

舟中

販鹽賈客夜吹笛賣菱女兒朝刺船沽酒得魚能不醉
幾錢堪買此江天

觀漁舟

晚晴吏退漫凭欄注目溪光巧映山忽見漁郎輕盪槳
宛如相見在花間

坐上呈葉守

暝紫朝青千萬層使君衙退剩登臨東華明日軟紅裏
欲看此山無處尋

宿白羊二絕

入得瞿塘始斂愁峽山行盡放眉頭澄江一道元如許
自在身心自在舟

古柳維舟帶暝陰
夜寒剪剪到衣稜
客中不覺年華換
小市人家已試燈

次樂磧

客裏何曾得展眉
偶逢一笑莫相違
酒濃燭暗真宜醉
風色蕭蕭愁欲歸

濟源廟海子內有二黿人以將軍目之投餅餌
則至

我欲燃犀起蟄雷
漫誇海蘚紙錢灰
將軍不是池中物

也為區區餅餌來

七月十六日離鄂渚

一萍泛泛幾時休
昨日黃州又鄂州
醉語醒來都不記
小灣才轉失南樓

新灘三首

叢祠風俗尊淫祀
灘戶生涯利客船
儵忽未興酬德意
不知曾有此山川

漁父長歌招屈子女兒
高髻學昭君
雖存九辨欲誰繼

便有琵琶那忍聞

蜀船南來去未休
吳船西上到沙頭
人生能著幾兩屐
三峽風烟替往愁

小孤二絕句

蜀犀無用苦犇忙
百尺江心如許長
無數鸕鷀巢徹頂
只將險絕作尋常

瑤池縹渺是吾家
嘗憶清觴覆九霞
霧鬢風鬟天下飾
可須人世俗鉛華

舟中

大小孤山專絕險上中水府柄幽權行人股慄船頭拜
小艇橫江來覓錢

帆風不飽櫓聲遲正是波平月上時今夜不知何處泊
買魚沽酒犒舟師

蕪湖即事三首

燒痕吹盡荻芽生江南二月春禽鳴閒倚柁樓看遠水
依依楊柳故園情

南人重魚長食鮮小魚棄擲不論錢老翁操網兒弄漿
一家生計在漁船

社風連日舟行遲社公有馬誰能騎不妨酌我盞中綠
依舊離騷醉讀時

瓜步兩絕

顛風惡浪雨喧飀往事愁中一笑哈江上有人來喫酒
故應虎子是瓊杯

阿堅狼狽伏狸彝豈是長江解有神猶憶當年南伐語

會知正朔不歸人

蘄步四絕句

去歲南乘下峽舟西歸仍此聽巴謳
題橋亦淺丈夫事未贖當年犢鼻羞

數峯遙指峽中山漸喜崑戎氣象還
萬里虎頭華髮將只求生入玉門關

一樽相屬慰蹉跎酒債街頭苦不多
饒舌小僧休口貌年來何事不消磨

燒紙船頭祭水神
杯盤燈火夜青熒
老巫得蛟舟人喜
想象靈君醉未醒

偶成

驕陽前日擬鎔金
積雨逢秋却厭淫
本自乘除無德怨
枉勞嗔旱復嗔霖

小溪淺涸如焦釜
一雨朝來萬馬奔
舉手欄邊誇海若
已無餘瀝到鉶盆

黃流衮衮蹴天來
截岸夷洲不可裁
鳧鷖驚疆封遽如許

莫貪浩渺徑須回

畏日得涼才小愜因秋感歲却成悲君看八萬四千劫
只在爐薰起滅時

爺娘把筆祝功名四十衣衫半是塵倦去引杯成獨嘯
兒癡失學未須嗔

未老形骸足自支唯憂多病釀成衰詩書猶作癸丘將
稽首竺乾真我師

樂天已貴孟常把元亮雖貧飲亦豪等是逍遙吾自擇

不能為白但為陶

有弟書來喚我歸客情偏覺雨聲知
恰當濁浪粘空際
正是青山到夢時

眼入平蕪隔暝霞有兄官滿未歸家
三人兄弟仍三處
指點飛鴻一嘆嗟

仲明我友一肝腸愛子慇懃出妙方
病後藥囊真壁壘
老來貝葉是資糧

過長橋予醉卧不及觀用仲甄韻

長橋萬古入騷吟
跼跼輕帆卷夕陰
卷一作墮
醉卧不知清
景失老斂電掣笑秋鷹

富池祠

卷雪樓高首重回
江東那得許人材
只應漢鼎三分後
便有英雄一聚來

蕭何識信在逡巡
此事從來妙若神
不是將軍難着眼
正應黃祖是凡人

富池羅漢院有錢希白中大科赴信州別駕時

所題詩有陳朝栢二絕句

聖世能收晁董策孤舟來唱鄂君歌一看獻納元台表
可特脩名在異科

皮膚脫落餘真實須鬣蒼浪閱歲華突兀一根叢棘裏
不知幾見後庭花

題富池羅漢院

竹深樹老小禪關關對江淮千古山萬舶堆中江上樂
時時簫鼓寺前還

登寶公塔

樹老巢翻鷹亦化，錫飛近地鶴猶驚。
太平寺主今安在，潮打山圍建業城。

三尺杖頭閒一把，興亡隨分百餘年。
我來但愛松風好，覓得僧窻一覺眠。

再遊蔣山

寒山寺裏立斜暉，只有垂楊自在垂。
不待新亭成灑涕，向來已識寧馨兒。

六經豈解亡人國萬卷平生最苦辛只作卧龍嗟晚悟
當年人畏近前嗔

客中二絕

客中有夢自難成未了風聲又雨聲二十五聲秋夜點
誰人數得甚分明

角聲定自與誰語月色不應無為明已作楊花着泥久
無多心事惹愁生

對月戲簡坐客

夜涼溪月等閒斜半折寒蘆委雪花一葉與君從此逝
松江烟雨著浮家

巫山一何高七絕

巫山一何高片片朝雲飛靈雨滿旗神女去夜月吹笙
神女歸

巫山一何高積翠擁陽臺欲向楚臣誅綺語莫問襄王
來不來

巫山一何高鸞停鵠飛舞上頭有路通紫霄正恐朝元

從此去

巫山一何高山空夜寥寥我有不餐烟火句黃冠留作
步虛謠

巫山一何高羽衣飄婀娜歸寧金媼到瑤池爛熟蟠桃
求一顆

巫山一何高駘蕩壺中春玄猿莫遣上山去偷飲仙漿
醉攬人

巫山一何高曉雨發黛青癡兒休作髻鬟看浪起矛戟

生心兵

詞

踏莎行

靈泉重陽作

菊露晴黃楓霜晚翠重陽氣候偏如此異鄉牢落怕登臨
吾家落照飛雲是舉扇塵低脫巾風細靈苗醫得人憔悴
尊前點檢欠誰人惟有斷鴻知此意

如夢令

前題

老挿黃花不稱節物撩人且任破帽畧遮闌嫌見星星

越甚不飲不飲和取蜂愁蝶恨

醉蓬萊

同幕中諸公
勸虞宣威酒

正紅疎綠密浪軟波肥放舟時節載地擎天識堂堂人
傑萬里長江百年驕敵只笑談烟滅葭葦霜秋樓船月
曉漁樵能說分陝功成沙堤歸去袞繡光浮兩眉黃
徹了却中興看這回勲業應有命圭相印都用賞元功
重疊點檢樽前太平氣象今朝渾別

小重山

綿守白宋
瑞席間作

輕暑單衣四月天重來閒屈指惜流年人間何處有神仙
安排我花底與樽前爭道使君賢筆端驅萬馬駐平
川長安只在日西邊空回首喬木淡疎烟

青玉案

和雅守蹇少
劉席上韻

相知元早來何暮社鷺送秋鴻雁去春草春波愁目注
酒香花韻綺譚妍唱怎不思量住虛無指點騎鯨路
箇是騷人不凡處畫棟雲飛簾捲雨風流千古一時人
物好記樽前語

虞美人

春懷

一春不識春風面，都為慵開眼。
茶蘼雪白牡丹紅，猶及樽前一醉賞芳醲。
東君又是匆匆去，我亦無多住。
四年薄宦老天涯，閒了故園多少好花枝。

點絳脣

德茂生朝作

一剪秋光阿誰洗，得無纖滓。
冰壺徹底人也清，如此

萬里歸來著箇斑衣戲。
慈顏喜問君不醉，更遣何人醉。

感皇恩

無害弟生朝作

萬綠壓庭柯雨晴烟潤三尺金猊麝微噴
百花香暖釀作九霞僊醞祝君如此酒年年飲
揷額漢貂垂腰蘇印趁取如今未華鬢
三茅兄弟總有丹臺名姓蟠桃熟也未教人問

武陵春

德茂乃翁
生朝作

曉日簾櫳初破睡寶鴨宿薰濃笑指圖中鶴
髮翁僊骨宛然同萬里郎官遙上壽五馬
茜衫紅待揷華貂酒滿鍾仍是黑頭公

謁金門四首

晚春

行不記貪看遠峰顰翠風約柳花吹又起故粘行客袂
老大渾無懽意不為傷春憔悴茅屋數間修竹裏日
長春睡美

空竚立又是冷烟寒食開盡荼蘼都一色東風吹更白
我是綸竿倦客道上行人不識着取蓑衣拈短笛沙
鷗應認得

春又晚楊柳曉鶯啼斷落盡殘紅餘片片風狂都不管

作客惟嫌酒淺未敵閒愁一半人與青山誰近遠可
憐春夢短

山數尺江草江波同碧晚雨吹風才數滴行人心更急
漠漠疎烟如織遮斷客愁不得腸斷故園無信息燈
花閒手剔

玉漏遲

送官
東南

東南應眷倚當年麗絕今其餘幾雲錦飄香好在藕花
十里六月長安徂暑只一雨滂沱都洗君好為携將蘇

醒三吳生齒 總道秦蜀謳吟但消得雍容笑談而致
稍待秋風也擬買舟東逝收拾塵編蠹簡更飽看江山
奇偉歌盛美還送往趨天陛

滿庭芳

過黃州游雪
堂次東坡韻

歸去來兮吾歸何處舊山閒却崑我雪堂重到但覺客
愁多來往真成底事人應笑我亦狂歌憑欄久雲車不
至舉盞酌東坡 少年渾妄意斗衝劒氣雷化龍梭到
如今翻羨白鳥滄波松栢皆吾手種依然烟蘂霜柯君

知否人間塵事元不到漁蓑

戲改殢人嬌

癡本無緇悶寧有火都是你自纏自鎖高來也可低來
也可這宇宙何曾礙你一箇休說榮枯強分物我惺
惺地要須識破漁樵不小公侯不大但贏取饑殮醉來
便卧

洞仙歌

憶別

雲牕霧閣塵滿題詩處枝上流鶯解人語道別來知否

瘦盡花枝春不管更遣何人管取平生鷗鷺性細雨
疎烟慣了江頭自來去不見鵲橋邊只為隔年翻贏得
年年風露便學得無情海中潮縱一日兩回如何憑據

卜算子

前題

生別有相逢死別無消息說着從前總是愁只是不相
憶月墮半窻寒夢裏分明識却似嗔人不憶他花露
盈盈濕

水調歌頭

江上作

江漲解網雨衣潤熟梅天高人何事乘興來寄五湖船
才聽簌簌疊奏嘔軋櫓聲齊發幾別故州山轉盼青樓
杪已在碧雲端 渡頭月臨晚霽泊清灣水空天靜高
下相應總團團遙想吾家更好盡喚兒曹汛掃欣賞共
嬋娟應念思歸客對此不成眠

臨江仙

江上九
日即事

三春都過了尋常偶到江皋水容山態兩相饒草平天
一色風暖燕雙高 酒病厭厭何計那飛紅更送無聊

鶯聲猶似耳邊嬌
難回巫峽夢
空恨武陵桃

于飛樂

為海棠作

薄日烘晴輕烟籠曉
春風繡出林塘
笑溪桃并塢杏忒
噉尋常東君處沒他
後成甚風光
翠深深誰教入骨
夜來過雨淋浪
這些兒顏色已惱
亂人腸如何更道可
惜處只是無香

西江月

為木犀作

色似臘梅渾淺香如
薝蔔微清更張綠
幄蔽輕盈巧着

工夫闢釘 露葉涓涓月曉風英點點秋晴江南江北
可經行夢到吳王香徑

眼兒媚

中秋無月作

素娥作意失幽期我自不憑伊舉杯重嘆帖雲微笑應
道人癡 如今老去無情緒只有睡相宜建溪一啜木
犀數剪酒醒歸時

朝中措

失題

相思兩地費三年明月幾回圓鷗鳥不知許事清江仍

遶青山 樽前歌板未終金縷已到陽關起取臘前歸
去梅花不奈春寒

千秋歲

別情

玉林照坐款款花微墮春院靜烟扉鎖黛輕粧未試紅
淡唇微破清瘦也算應都是風流過 把盞對橫枝尚
憶年時箇人不見愁無那遶林霜掠袂嚼藥香粘唾清
夢斷更隨月色禁持我

欽定四庫全書

集部

澹齋集卷

九至
十一

詳校官左中允_臣塘五珠

主事_臣呂雲棟覆勘

謄錄監生_臣范維城

謄錄監生_臣卞爾巖

謄錄貢生_臣劉錫珪

欽定四庫全書

澹齋集卷九

宋 李流謙 撰

表

天申節賀表

曰天下君曠代聞於間出惟仁者壽至理期於必然遙
伸拜首之祈式表同心之戴中賀恭惟增光祖烈博愛

生民著三紀之勤勞興九葉之系緒推成功而與子畢
協謳歌體妙道以法天獨高淵默德澤深而福備神慮

澹而氣和自膺億萬之年寧俟再三之禱某身縻遠徼
目接休辰渺渺彤庭莫覩漢觴之舉綿綿蒼籙獨祈周
歷之延

又

有王者興至五百歲以天下養何千萬年惟生商之瑞
自天申之凡戴舜之人與我共此三呼耳屬八表心傾
中賀恭惟誕受珍符丕昭純烈履艱難而歷三紀功光
祖宗合南北以為一家仁及草木靡蹈過中之悔莫窺

藏用之神方將游四海而御飛龍如天不息故能舉一朝而棄敝展視堯愈光知進退唯聖人得名壽必大德屬流虹之盛節激舞獸之忭悰率土莫非臣豈但華封之私祝昊天有成命固非神筭之能探臣迹遠隆墀職縻遐服遙瞻闔闔阻趨九陛之深嚴近拜冕旒莫綴干官之雜還

又

有王者興統實接於千歲以天下養夢將應於九齡八

極心傾三吁耳屬恭惟動天唯德守位以仁坐蓀無象
之太平光膺有僕之景命推成功而不處永我慶支體
妙道以獨高超然塵表德澤深而福備神慮澹而氣和
殆將與造物者游豈止於後天而老臣拘維遐徼邈遠
隆墀近拜冕旒阻薦露囊之瑞遙瞻閭闔輒陳金鑑之
辭

又

天開鳴社之祥實興寶運地震呼嵩之響俱祝皇齡幅

員所同宗祏有永恭惟聖若稽古大唯則天再光赤伏
之符方衍蒼姬之籙功成不處將與夫造物者游德盛
愈新豈止於後天而老當執衡之令月值繞電之休辰
文軌一家戴父堯而子舜雷霆萬喙祈壽嶽而福川臣
假守窮邊預聞歡頌稱觴莫遂但輸獸舞之勤望闕徒
勞孰借鳬飛之便

會慶節賀表

惟天祐於一德方茂慶支夢帝與我九齡益隆景命適

當盈數之月恭致後天之祈聲極嵩呼志深葵向恭惟
皇帝陛下愛兼南北孝通神明有道之長開八荒之壽
域無為而治得萬國之懽心丕承奕葉之燕謀將接千
歲之聖統正歸馬放牛之際運撫泰寧值流虹繞電之
期祥臻震夙宜延洪於寶厯仍均福於函黎孰不來享
而來王舉知善頌而善禱某謬將遠使阻綴周行俯陳
金鑑之辭照臨莫及仰薦露囊之瑞舞蹈惟勤

又

蘿圖方永宜聖哲之挺生穀旦親逢統邇遐而胥悅合

懽謠而雷動願睿筭之川增

中賀

恭惟守位以仁動天

惟德受堯天下而不泰卜周歷數而過期鳳集麟游百

樂生於治國龍飛虎變萬物覩乎聖人以安四海之勤

勞必享五帝之壽考況當良月允煥休辰俯察仰觀自

協天人之助下動上應何煩祠祝之求臣假守窮邊遙

瞻瑞闕犇趨莫及阻陪神嶽之呼舞蹈不知敬上南山

之詠

又

誕開流渚之祥惠此中國虔致呼嵩之禱格于皇天海
宇一心聖人萬壽恭惟握符接統推澤撫民物臻時序
之和德致日新之盛幽靈錫羨福蓋本於自求遐邇宅
心思無有於不服休辰適值懽頌翕歸齊四大以居尊
仰參天地與九齡而協夢永主神人臣假守窮邊阻趨
華闕稱觴漢殿莫遙迹於簪纓注目堯雲徒傾誠於葵
藿

賀改元表

訖精禋而肆眚施及無垠更美號以紀年義符不息邨
傳至止觀聽竦然竊以元者氣之始哲王所以奉天名
者實之賓聖人所以彰德白麟寶鼎庸昭迭至之祥甘
露黃龍載表中興之盛事標曩牒禮協熙朝恭惟寅畏
昊穹祇嚴慈訓爰因大享既流春澤之濃併易嘉名實
體乾行之健凡同文軌俱極懽謠某假守偏州預覩曠
舉綿綿蒼籙獨深詠於過期渺渺彤庭第阻陪於率舞

謝宣賜曆日表

太歲在酉前民事以授時衆星拱辰環侯郡而奉命聿
新觀聽同囿文明中謝恭惟道體泰亨德符乾健臨御
九載適進業之日登敬休萬年宜與天而齊壽周幾所
隸夏正是遵臣濫守霞城欽承日曆定時紀閏式沾堯
治之雍熙治郡養民願布漢恩之寬大

賀冬至表

陽剛得位爰方慶於大來聖哲乘時德亦同於廣運歡

均率土福集清躬

中賀

恭惟皇帝陛下與天後先視帝

陟降盡徹羣陰之蔽廣開衆正之門君子在朝士有光
亨之吉庶民蒙祉物無疵癘之傷坐觀玉燭之調安享
袞衣之治臣分符有守應闕無階滌滌獸尊徒切涎流
之望翩翻鳧舄第勞占視之勤

又

黃鍾應律欣迎化日之長紫極垂衣共慶縟儀之舉式
均景祐溥覆函生恭惟皇帝陛下體道變通法天旋乾

對四時而錫福綿億載以擁休氣肇一陽翕致睨消之
喜心傾萬國益堅葵向之誠臣佐職塞垣馳神禁掖千
官雜沓阻奉萬年之觴雙闕咨堯但極雙鳧之躍

謝賜茶藥表

溫檢式頒德意溥博寶奩載錫品物光華雖登受以為
榮顧冒居而曷稱伏念臣守邊何補考績愈踈屢干從
欲之仁將遂投閒之計低回未果黽勉獨慙豈圖蕞爾
之軀上軫惻然之念寵分靈劑遠及荒陬炫私室以輝

騰拊危衷而愧發此蓋伏遇乾健下濟泰亨大來申恩
推造化之慈加賜重臣工之勸永惟銜荷徒極靡捐哀
恭可扶或未愆於膺力勤勞是効敢有愛於微生

劄子

上張魏公論時事劄子三首

竊謂功罪不別賞罰不立雖堯舜不能以一日治夫人
之所共畏而不可強驅之前者死也然用兵則驅之死
而人不敢畏者以其所畏有甚于死而死之中有不死

者存而求不死者適所以速死則其於死蓋亦有欣然就之者矣何故今使士卒操戈而前兩陳之相向擊刺之相及蓋萬死而一生人孰不畏之然吾嚴立法制而明告之曰退必死進必賞彼苟進焉吾亟第其功不崇朝而賞之其退也不離跬步則誅矣彼其心必曰吾之進固有死然盡力而戰往往不死不死則歸而受賞不然一反顧白刃在後身首離矣夫如是人孰不求進未必死且有賞而甘就夫退而必死者哉古之人百戰百

勝用此道也今日用兵之弊正在夫進未必賞退未必死夫進未必賞前有死道吾何苦犯之退未必死後有生路吾何為不就之夫使士卒而知進未必賞退未必死則雖太公穰苴復生不知所以為計雖然士卒畏死吾不勝其治也責在將帥今將帥亦知退不必死矣將帥之愛身尤甚于士卒故將帥而知不必死士卒不可使矣不亡何待宋文帝七年與魏戰竺靈秀以棄城伏誅二十六年垣譙之以軍敗伏誅南北之際不足言矣

而猶有此焉近時周世宗親征樊徽何愛能引兵先遁
即收斬之其後將帥亡有不用命者而平三關取江北
諸州功冠一時寔本於二將之誅然則今日之事愚謂
先功罪之辨必賞刑之用而功罪之辨論賞刑之所加
仍自將帥始持之不移斷以必行苟使將帥用命則士
卒用命士卒用命則前無堅城進無強敵何攻而不拔
何戰而不克哉

竊謂天下未定國之命寄於兵兵之命寄於將故將之

任於今為最重然運丈八之矛操倍尋之戟挽累石之弓遇城必拔遇敵必摧將也然今不患無是將患未見一禮義之將爾夫禮義之將必深明上下之分熟計逆順之宜通知古今服習法度知有君不知其身知有國不知有家謙恭而不矜廉儉而有守仁足以撫士卒義足以服強暴量足以容賢豪而不忌器足以任勲名而不驕有功即以讓其偏裨得財即以散其部曲夫如是假其英名資其威望猶足以怖強敵折悍寇而況託之

征討委以克復則何攻而不取何戰而不服哉荀子論將曰天下之將通神明少陵曰安得廉恥將夫將而至於通神明可謂難矣若少陵之所謂廉恥則愚言近之昔孫權教呂蒙以讀書謂非必區區於章句之間欲其通古今明大義知尊君親上而已晉文之圖霸也先定襄王以示民義伐原以示民信其後用之卒無敵於諸侯夫士卒爾而猶使知信義而後用將帥而使不知禮義可乎今似不然矣謂之才者姑曰撫劒疾眎彼烏敢

當而已謂之賢者姑曰循循謹守不敢跋扈而已一時
之所謂賢與才者已萬不及古況復不賢與才者又當
如何哉嗟夫以此為將何以服士卒以此使士卒何以
責之北首而死敵察厥本原豈不自知禮義始唐李光弼
郭子儀俱事安思順不相能至不共盤飧及祿山之變
光弼頓首請死子儀下堂握手丁寧寬譬以國難主遷
勸令東伐曰此豈念恩怨時乎李光弼伐蔡韓弘疾其
功求所以撓之乃飾美姝以獻光弼集將士流涕謝而

遣之裴晉公之人蔡也李愬謂此方之人久廢名分乃以節度使身屬橐鞬講郊迓之禮晉公止之不可其意欲以風變惡俗嗟夫使當今有李郭之仇往往因事報之矣有美姝之獻往往悅而受之矣以節度之貴重雄嚴未必肯俯首道周以展尺寸之敬矣故唐雖多亂而隨亂即平者以將帥得人而將帥得人者以知禮義故耳雖然今天下之大豈無一人知禮義如三將者恐求之未至任之未專耳欲望博加搜訪苟得其人益勉以古人

之事使各相策勵以共奮于功名之會而毋自後于昔人不亦善乎

嘗謂用兵在知攻守而知攻守在將帥聽其攻守在朝廷人之言曰將在軍君令有所不受攻守何必朝廷之聽而朝廷亦何必預其事是不然將而才專之可也朝廷無問焉可也若雖才矣而猶有所未至為將者何可不聽為朝廷者何可不問然吾于此有說焉將為之朝廷議之將之所為是朝廷聽之否則禁之勿為是一說

也然將之言朝廷未必盡察之則當反覆詰之詰之而盡其是非其說果非也決去之萬有一是猶將試焉漢趙充國伐先零請先事屯田朝廷迂其計璽書詰難至于數四充國亦堅持前議屹然不變朝廷卒從之而充國亦卒有功向使朝廷第守已行之詔不復更加詰難充國亦畏威迫勢輕奪已見以逢迎上旨則功之成否吾未知之日者吳璘之取德順議者不一其談或以為竭有用之力事無庸之地或以謂實扼襟要得之可以

進取朝廷未嘗遣一介究問本末徒以人言萬里遙度
亟詔班師大軍未旋而兵烽復滿于四郊向所得諸郡
隨而淪陷兩京五路恢復愈遠至今人以為失策某書
生也未能斷其是否然區區之愚私謂當璘之舉也朝
廷當先賜詔書使條上攻取之宜若曰德順之為軍其
地形為何如在敵其利害為何如得之果足以制
敵失之果足以為患然後下其說集廷臣博議其說是
聽之使攻其說非明告而止之或璘之說是廷臣之見

未盡又使反覆其言必使詞盡理殫而後已夫如是則或攻或棄必有成謀而無輕舉妄止之失今則不然璘之欲攻德順也朝廷不知其說朝廷詔之班師也璘不知自守其說一人焉曰德順之師可罷朝廷即罷之萬一德順不可取又一人焉妄曰可取則朝廷亦輕信而取之矣夫軍之一進一退皆有大害一者老師費財二者可進而退可退而進俱失機會今璘舉兵頓之堅城之下亦既經時四川之財殫于供輸戰士之力憊於攻

鬪一旦不問可否不究是非猝舉而棄之墮垂成之功
貽未艾之悔朝廷不知其議將帥又不能自守其說以
數萬姓命若一置碁之易是安得不失策雖然此已事
不足追論然方用兵之際攻取之機其來不一或後有
如是之比者似不可仍蹈前轍欲望朝廷用趙充國故
事凡有攻取先使邊城條上朝廷熟議而後從之庶乎
毋悔或曰攻取之機有一日數至者一一必先使邊人
條上朝廷平章而後行得無重失機會曰是不然夫攻

取之形勢其利害有在目前者有係根本要切者若目前利害可進即進可退即退隨宜應酬將帥專之不從中御可也若其係根本要切如趙充國之取先零璘之取德順則可不熟計深慮而後為之乎

論廟事劄子

竊惟七曲之神有大造於蜀蜀人事之舊矣而比年以來所在郡邑侈大祠房崇飾像設眎前益嚴獨吾邑苟便荒陋未遑改築靈風蕭然神不來舍日者鄉人合議

願効力焉既以告執事執事俯已從衆亦幸開可而某
要有言焉蓋舉大事必有異論止異論必有老成今茲
之後革數十年之卑陋亢大而高明之土木工徒費餘
萬計化誘勸導震搖一邑可謂大事矣邑之人戴神之
德之功以安樂其生孰敢不從然某之私意尚慮其間
有吝財嗇力者憚而不欲為好勝護前者忌而不肯為
善惑易搖者疑而不敢為合是三者黨伍相朋浮動相
扇將沮敗吾事故曰舉大事必有異論雖然天下之事

則有天下之老一國之事則有一國之老一鄉之事則有一鄉之老顧今爵齒俱尊邑人視儀而聽唱者孰如執事執事有意而廟成矣何則執事能損半錙則吝才嗇力者將傾家以施執事慨然舉是役以為已任則好勝護前者將拱手而聽執事抵龜而決持必不移則善惑易搖者秉心以服從故曰廟之成否在執事不在邑人是之謂止異論必有老成某鄉曲晚輩開口妄議則有罪然自惟其財之不足而不敢憚也知從衆人之所

共欲而不敢忌也知是役之舉實當人心而不敢疑也
且又以老成為可託順風請焉以來求主盟則妄議之
罪可赦也日者屢有異夢非神以可託而告之也以其
知老成之可托如執事者而使之言也某不言為負神
神將降大戾於厥躬不可悔

與汪制置劄子

某才智淺短暗於事機加以耆衰迷謬滋甚屢蒙台慈
貶損俯加諏采而芻牧之見終無以自效殊深愧赧然

某蜀人也於蜀之利害粗所諳委欲殫陳悉數恐祇益為煩而瀆台聽姑掇其最大者一二伏幸台坐試一察焉其一朝廷和好既成此實如天之福然愚意以為使天下知和好之成必使之知和好之利而後可何謂使之知和好之利休息其力此和好之利也何謂休息其力稍撤邊屯移之近地使就食其粟而省漕運之費此休息其力之法也然此事可否在主帥而欲主帥聽從在台坐儻蒙台坐軫納溝之念俯為蜀百萬生齒不惜

一紙於吳公事必濟矣萬一於吳未可輕言妄意因其
入覲或通此意於廟堂若自以上意喻之計無不從果
從則蜀民真受和好之利盡出台坐矣其二蜀之為國
無旱乾水溢之憂者以堤堰為命爾故蜀人視堤堰脩
壞以為豐歉之候去年一不治農時而水不至蜀人大
恐有司治官吏之罪方行整葺而水已大漲施功無所
幾有荒饉之厄其為利害盖如此某之愚欲望台慈特
賜拯念脩治時精擇幹吏使以時興工毋忽其事庶幾

工役堅緻無後時之悔則屢豐年矣其三紙幣之行于蜀舊矣雖有聖智莫能改然其貴賤低昂亦有可論似非壓陌之人所能為盖某嘗聞蜀故老之練達者矣以為欲其價常贏而無虧損之患唯使常用于官而不滯于私則可矣何則以一說觀之每州之春引直必虧至筭茶之出官司催驅之時則例增何也當是時盡用于官而不滯于私故爾故老練達者之言以為此乃流通紙幣之妙為今之計但常求所以用于官而不滯于私

則無虧損之患矣區區三說實愚陋之見置之明鑑之下妍蚩洞然所以不避斧鉞冒昧陳述誠以台坐憂念蜀人之至求治之勤而下問之切是以敢私布之

欽定四庫全書

澹齋集卷十

宋 李流謙 撰

書

上樊運使書

古道不振久矣平時號耐久朋盃酒接慇懃詡言笑
相徵逐出肺肝指天日誓不相負一旦反眼不相識爭
小利害甚於寇讎况其人身沒已久歲月荒遠墓木幾
中梁柱金蘭情義宜愈益渙離豈復一掛宵臆乃欲望

庇護其後人起之於堙阨而援之於衰寒使有不孤之嘆不亦難哉雖然古道非亡也人自不由也居今世而以是自任則古道固宛然也豈得以凡常齷齪之見遂誣一世之士恭惟台坐於先君子真耐久朋也其同僚其交承世尚有之而近時同僚至于反目交承至於攘臂豈必端以是為契好哉所貴於兩公者蓋精神心術之冥符而操踐趣向之相似雖別體異軀不啻一人殊宗各姓殆如一家宜其投分之深締交之篤不但汲汲

於生前而尤切切於身後用能回古道於萬鈞挽一髮
之時使頑薄之夫為之興起噫嘻不亦盛哉是以勾龍
某先君之子壻也而台坐愛之如其子壻舍弟某既辱
驅使又辱論薦凡所以借之齒牙傳之羽翼者無所不
用某之拜台坐於金堂也已二十年前而台坐每見待
遇尤寵某之注此闕也以為淹遠則為嘆其求之官也
則極力推挽使亟就賤次懇惻之愛愈於父兄稠疊之
惠暖於布帛仰惟台坐一世偉人凡擁帚門闌置身爐

鍾無非名流而某親戚兄弟顧何脩而聯裾屬袂以得此此無他以先君子故爾非以先君子故以古道所存故爾然則某今也有區區至情不於執事焉布之尚何之哉某前任某官兩考今任展就四考通前為六則有磨勛之望此一段恩施固已專歸之台坐矣而台坐視一道吏屬之賢與能雖非某所敢望不應後之而先某然獨持向者之說妄僥冀焉台坐果若有意此已為犯不韙之罪竊非分之寵矣尚復何求然猶未免於無厭

之請此盖當在誅絕之域者姑冒昧言之而聽可否焉
盖台坐以父師臨之而獨可不一輸其子弟之情乎某
今年某月日已得三考初意止俟一考至明年作四考
以年勞闕陞不敢多妨賢路而竊公器適篋中偶存何
舍人一削而張使君既許以改官狀叔錄又憐其坎軻
流落欲其亟遂寸進乃復先以職狀畀之今闕陞文字
遂僥倖有其二若遽舍之必俟一年後年勞之語似深
可惜於是始萌妄意欲更得垂成一削就今年三考先

圖闕陞旁徨四顧無所依投唯有歸赴門下可冀萬一
伏望台慈赦其狂謬未賜誅責以兩削弃去為可惜而
不以後日再求出門下為無厭以一職令狀先次陶鎔
使早獲放散然後重以京削成就使闕陞磨勘二者盡
出乾坤之造比他僚屬受恩者若差異則某所効報亦
不敢自同於他人而已恭惟盛德大雅曠然有容而冰
鑑之明物無遁照其於某察之深知之熟蓋不在與羣
吏比肩並髀超走奉事之際某之駑鈍尚何所言獨以

論契好而求薦近於私一之謂甚而欲再焉近於不知足然希闊之逢特達之舉昔人難之日中必曄操刀必割此為投機者言也某方負門戶之託急百指之養有未能遠引高舉者故敢援此說以獻

上張雅州書

嘗謂天下幸會有如是哉生乎其鄉沐浴濡潤則有粉社之好先世於其一門羣從號平生交芝蘭臭味異根同氣則有久要之義兄弟出仕弟之為尉則在寮末兄

之備數泮宮則為吏屬借庇託蔭俱得以斗升活其孥
累積是數者求之於古竊其一猶足以藉手而況併有
而兼得之西方之人以為緣法而智者以為機會不肖
者以為忝冒噫某何脩而得之其必有相之者矣然則
使其或有哀懇不於門下焉布之尚將奚之某前任靈
泉尉兩考今任展就四考通前為六則有磨勘之望此
一段恩遇固已專歸之台坐矣而台坐視諸僚之賢與
能雖非某所敢望不應後之而先某然獨持向者之說

或庶幾台坐一動心焉此已犯不韙之罪矣然又有無
厭之請焉某初止欲更一考用年勞闕陞而篋中偶存
何舍人一削樊使者亦許陶鎔輒萌妄意欲先望台坐
以職令狀收錄使足有三早諧寸進然後徐以京削成
就之使首尾二年兩拜丘山之賜而闕陞磨勘盡出門
下比他僚屬受恩者若差異則某求所効報亦不敢自
同他人而已恭惟盛德大雅曠然有容而冰鑑之明物
無遁照其於某察之深知之熟蓋不在與羣吏比肩並

駢超走奉事之際某之驚鈍尚何所言夫論契好以求見近於私一之謂甚而欲再焉近於不知足然希濶之逢特達之舉昔人難之日中必曄操刀必割此為投機者言也某方游乎人間世敢援此說以獻

與鄭擇可辨屬字書

某愚陋不學掌教大邦日從瑰偉傑特之士游雖未熟接語言然觀其文詞覘其狀貌盖平生歷游名勝之場耳目所未聞見者固已心服而意降又蒙時出規誨箴

其不逮尤所嘆佩如日者屬字之誤遽欲指摘以為諱
字久謬積訛一朝泮解此則哲父察兄教其子弟者顧
其何以得此宜亟奉教無異詞矣然頑鄙終有不自釋
者蓋非好勝求以蓋其失亦問以辨之之義是以前日
嘗援引律文并考證經史音義以正指南矣退而思之
疑卒不解蓋自有文章以來未有若東坡先生者也其
人非特雄於翰墨忠義之節勁果之氣橫絕古今觀其
立朝尊君親上之心根于天性然獨在神廟哲考時其

所為文章喜使此字蓋是時固諱之久矣而公獨不避
且以燕閒之作歌詩記引或在所畧猶可也乃今皆用
之君上施之朝廷垂之典策者此何理哉將盡數之不
能悉試舉其槩其作趙清獻神道碑云州郡以酒食相
饋餉破家相屬也溫公碑云官其親屬十人范蜀公碑
云令宗室屬疎者補外官又云時公已屬疾夫二三公
皆元老大臣其碑之成必經乙夜之覽而後著之金石
公以肆然落筆何哉又其自上皇帝書云陛下誠欲富

國擇三司官屬又云廣置官屬又云賈誼請為屬國元
豐中乞療病囚狀云若無親屬雖有而在遠元祐中繳
楚建中詞頭云近者起文彥博天下屬目又奏巡捕鄭
永崇狀云並來簾前告屬又述災沴及脩河事云舉酒
以屬羣臣又論周種擅議宗廟事云無非天下公議所
屬且自敵以下名人之先為之子孫者猶且不堪公以
人臣納忠于君垂紳搢笏成誦於冕旒之前乃斥其祖
考之諱至于六七而不少忌此則甚矣然又有甚焉其

在詞林作溫公祭文云社稷之衛中外所屬又賜韓絳
詔云卿德望之重中外所屬又賜大遼人使口宣云屬
此方春之旦又賜孫固乞致仕不許詔云屬任之意又
賜皇叔生日口宣云卿屬尊望重又奉安神宗御容導
引詞云賜斷屬車音夫制詞乃王言詞臣特代之耳如
上所云乃是天子自稱其祖考之諱夫以祖考所諱而
號令天下于理順乎且東坡先生非不學者也非不辨
字之音義者也非素悖慢犯上者也今若此愚誠不知

其說豈其偶失於此當時淹該博辨者所不敢正留以
待後之若足下者乎此未敢以為然也然東坡不見正
於當時之淹該博辨者傳幾百年而得足下雖東坡先
生亦曠然發蒙而况僕乎願卒聞金玉之音以幸誨我
不宣

上王直閣書

紹興歲戊午先君為尚書郎嘗獲拜台坐於臨安退而
誦其文歌舞其德於搢紳士大夫以為一時之榮遇又

退而手書其姓氏於牘詔子若孫謹誌之勿忘曰後將
大庇汝曹迄今歲己卯九十二寒暑矣先君不幸既
即世而台坐凌厲華貫超躡顯義未即相天子澤天下
廼垂翼于蜀而某始獲以疵賤不肖之軀唐突化爐因
記異時之言嘆曰先君其神乎夫誦其文歌舞其德以
為榮遇固也至於書姓字詔子孫使勿忘意者其已知
台坐今茲之來蜀而某獲在下風也歟然則某今之得
見固非苟然者雖然此猶私也某嘗讀易至此之上六

蒙之六四觀之六二未嘗不廢卷而嘆以謂士求表植
於世而其才其行不足以自達則必求一代巨公委身
扳附冀有以發然後晦斯光室斯通無慙於小人之歸
不然日月在前自蔽其目咸韶在御自覆其耳則愚益
愚庸益庸終於偕犬豕之齒而俱叢枿之腐顧不重可
惜哉是以比之時皆以比輔為吉後夫凶而上六獨後
焉故有無首之戒蒙之時皆以闇期明柔期剛而六四
獨遠之故有困蒙之吝觀之時盛德顯臨衆目睽睽而

六二寡所鑒見僅同管窺故有女貞之醜豈非介於賢而不知事隣於德而不知擇故聖人憫焉因六畫以顯義而指其所之乎恭惟某官德盛業備是固易之大人蓋嘗妄論之其宗主一時人物而為羣衆之所爭附則固易之比其剖扶晦昧而為暗者之所扣擊則固易之蒙其光赫盛大而為卑陋淺狹者之所徯屬則固易之觀使其基於此不早求自託焉則無首之戒困蒙之吝闕觀之醜將萃於厥躬而貽無窮之悔矣是以既援其私

而又取易之說以獻庶幾台坐或有取焉而不敢必也
所業若干篇謹以代贄先世業是子孫不敢不勉誅之
貸之俯以竢命

上王提刑書

嘗謂天以永祚遐福畀其國使億萬斯年無有終極固
其君積仁累德大簡帝心以有是熾昌厯艾之報亦其
臣左右介助先後弼贊遂濟登茲故其君既享有是報
則福之所被臣亦復預享之宜其子若孫蕃衍盛大條

森葉布與國同休晉王氏謝氏唐蕭氏最號顯門晉享國二百年唐享國三百年而三家文獻相承簪冕相屬世居盛位而執要權與兩國廟社幾為終始其間異才輩出又皆軒磊超拔雋功殊庸震赫一代若不專以閱閱喬胄取重於時尤斯人喜稱而樂道之者本朝以揖遜撫運僊源廣深聖子神孫堯仁舜慈一治所範熾昌庀艾之福如川方至眎晉唐幅員狹陋圖歷徧促直漏刻頃故當時朝廷之上碩儒魁士巨公耆老類能以格

天事業蓋代勲績出佐盛明既自躬襲休榮備受祉福
而叢慶所覃蟠固宏厚又間鍾奇產代為世瑞至于今
奕然而愈光若宣徽王公固其卓越著見書在盟府炳
如日星者蓋公自是絳闕真品丹臺僊吏跌足人世殆
若戲然故能以壯歲決科遂冠天下盡歷顯美安處崇
華方承平盛際真主在上四海一家中國一人禮制樂
調內恬外肅而公以棟榦大臣股肱哲輔如山如嶽如
虎如龍天下之所注想四方之所偃服譬之河出崑崙

橫貫地軸浸天沃日其來無際是宜派流之長萬里一
道滔滔汨汨至于海而未已顧晉王氏謝氏唐蕭氏殆
蹄涔淺澁溝澮猝暴立涸可竢何足多談故愚嘗謂天
之昌宋若無終極則其昌王氏亦何有終極乎恭惟某
官宣徽公之令孫而當世之傑士也學博而精道峻而
容英果之識足以決疑滯穎利之才足以剴叢劇固自
濡染不凡賦稟特異如渥洼馬墮地必千里如丹穴鳳
振羽必五色伏自剖符名邦政績彰徹聲搖烏臺聯封

合章引致華近雖未即召除已屬宸眷寓直寶閣按刑
劇部竊惟攬轡以來振起惰偷興殘補漏勤民勦國之
念如切膚肌條教風飛禁令霜肅郡縣奉行疾於郵傳
村落林野稚耄鼓舞如對公面如接公語飽食酣卧無
有一吏傍門喘咳茲又輕觸畏景肅驅輶駕親按列城
玉節所臨當暑森豎噫嘻九人具是賢智美善雖出小
家寒鄉猶使人抵掌矜詫不能已已而况濟以大老故
家之盛則其頌詠夸述是豈單詞所能彷彿某妄男子

始以世蔭得官黃緣鎖試遂竊名第方拏舟南下賤闕
偶及饑來驅之徑就寸廩踈庸謬愚亦幸書考邑荒職
冗如在深窅仰睇崇臺何啻霄極春初蒙大帥號召以
職事留府城是時適值台坐擁節入境某尾吏屬一再
瞻奉固用欣快今又以弩矢在車塵之間其於覲德差
近熒躔因伏念國家之永祚遐福未艾若此而台坐實
與之俱又其賢智美善如上所云某之獲在吏屬與夫
數覘顏色非幸而何是用忘其固陋輒持是說并以斐

文若干為獻庶幾台慈或鑒其愚而與之進

上宰相書

嘗謂天地之大海為大若為乎其大也我知之矣蓋不在於彌亘六合并包宇宙上浸乾緯下溉坤軸淵乎其深浩乎其長乃在乎受衆水而容之雖勺潤涓流微波線溜凡行乎地中者往焉而海納之如納大川是以水得其赴各安其所歸無泛逆淫潰之灾方其赴海水而已矣及其至海無復水名窮天際地惟一海爾海之為

海是則為大若夫河之貫中國江之發岷隄濟控山東
淮奄吳甸其蟠據之廣九州而四分之非不曰巨浸也
然河有河而已不得而有江也江有江而已不得而有
河也曰濟曰淮亦莫不然蓋其受氣於天地其分量固
有底止源脉既殊派流亦別故可以大一方不可以大
天下况海之大又容是大者則豈可同日語哉故為水
計者當之海不當之是四者非於是四者有不服之心
盖苟非其類則有時而不我容誠不若是大者之不以

類而必能容我者某不肖蓋水之勺潤涓流微波線溜者也澤物無斗升之功負舟無針芥之力然獨知以海為歸久矣今雖遠焉萬折必東之心未嘗一息而已也試畢其說某之先人登政和五年第其試南省也傅崧卿為之冠先人在十人之列程文例進呈獨先人之文徽廟親洒宸翰褒之儒林以為寵其後為館職為尚書郎蓋紹興七年也晚作簡二冊以終而遺澤及其不肖之嗣初某之未命也先人責以不復世科屬續言益苦

其不能力竟負先訓最後兄弟受身後之澤然日夜感
勵抱此巨恨思有以自贖已而黃緣鎖試偶登科目若
粗酬九地之望者家貧急祿不果祇奉大對例思天恩
賜以名第初任備員成都之靈泉尉今年二月書兩考
薦者僅如格更一考可闕陞而代者亟來即日解去將
再赴外銓望一闕方在天上而口腹之養旦暮為急因
伏念先人以儒起家而不肖嗣勉讀其書亦僥倖復收
舊物乃今一飽不繼將有溝中之虞蓋水之失其性而

泛逆奔潰者是雖極甚么陋然在大者固將有所不忍
弃也是以某寧不之江之河之濟之淮而惟海之赴方
其赴之之難也雖衆浪激之而不亂大山大石觸之而
不沮蛟鰐魚龍震搖之而不駭必求達於所至而後已
實以海之大有以容我非若江若河若濟若淮擇水而
後受也恭惟某官盛德大業元勛偉烈其所以吞吐一
世灌注千古無適而不為海其間明珠之璀璨大貝之
錯落珊瑚火齊之珍奇固其文章之足貴也洪濤巨浪

之噴激懸流湍瀨之騰涌固其威望之足聳也千斛之舸萬斛之舟如浮一葉固其氣量之足載也霞裾雲旗之往來靈宮仙島之出沒固其高嚴祕邃之足慕也適丁休明遂建上宰凡所施設人莫知其涯涘以蠡測之但見夫加之以隆名大位而夷然不欣猶納之以萬川而不溢也凌之以彊兵大敵而鼎然不動猶洩之以尾閭而不減也鯤鵬之大既安於飛躍蝦蟹之細亦樂於游泳此其所以不辭萬折險艱辛苦而必赴之伏惟鈞

慈重察其懇迫之誠推夫納大川者納之而不弃容蝦蟹者容之而不拒則某歸赴之心粗若小慰某今所合入闕云云苟於是數者妄意或畀其稍近之次使竊一飽之計則某又若鷗鼠之飲於河滿腹而止豈復有所歛望哉

上張建康書

嘗謂人情之去就離合未嘗不在於榮瘁廢興之際而慨然可以感念亦未嘗不在於存沒死生之間蓋當塗

巨公方其操利達之柄制富貴之命吁呵生風雷叱咤移海嶽當是時凡具血氣心識苟思有以致其身求遂其尺寸之望孰不知填然躍而趨之一旦時有消息運有泰否車音在其耳而所謂伺候門牆者遠矣頌詠功德者往往變為讒且謗矣指日誓天願以身殉者反眼不相識矣此非他勢使然也獨有人焉秉志益堅信道益篤不以榮瘁興廢易其守曰吾主若人若人榮瘁即吾之榮瘁若人興廢即吾之興廢也吾曷為而輕於去

就哉嗟乎是人也雖不逮古人實今之古人固疾風之
草歲寒之松矣俄而所主者復進而在上瘁而榮矣廢
而興矣而是人乃不幸溘先朝露埋骨朽壤不得復依
休光潤澤以伸其積年之憤視墜簪破履反得再登君
子之堂則其慨然可感念豈不動仁人長者之心乎某
不佞試畢其說先君工部以鄉曲之舊辱鈞坐不世知
遇自登法從薦以自代夫薦之代已此豈細事在他人
以為文具而鈞坐實出推賢揚善之本心已而出使川

陝又置之賓幕其還朝則載之俱當國則召而用凡所以培植長養灌溉成就者不啻父兄之於子弟古人所謂知己所謂恩遇豈能過此在先君當如何報不幸薄佑數竒上累生成栖託未幾鈞坐適去國于時先君之身雖留于朝而心實惟鈞坐之從鈞坐之去未久也趙丞相屢遣人致意願見先君曰吾主張公公去席未寒吾以么麼進取輒望之而游他門可乎卒不往趙相為人言吾知某甚賢而文特未嘗過我亦大佳意若慙公

之不來也已而栢臺以為言班列以為言先君迹睽以
危乃力丐補外除漕東梓時呂本中舍人當制意有所
不快曰是雖優於儒學財計非長宜試以郡廟堂遣人
調護欲易以憲呂又不可乃授小壘以歸其後蜀士有
薦先君於秦氏者秦曰此豈非某氏客邪卒不報秦用
人最為不次於其同年之好尤篤持節把麾者猶其粗
也獨先君當其時閒廢以老然先君每欣然不以芥蒂
嘗曰張公有大勲勞於天下天下實父母之雖公欲自

逸天下其庸釋焉彼鬼蜮不量豈能久蔽日月旦夕行
相矣吾未死尚及以晚景累公藉不幸而死吾有子可
持門戶公苟念我不忘必惠吾子吾豈可進退出處以
辱公已而先君不幸果死迨今十年鈞坐始以天下不
能庸釋之故再登用將入相天子盡鈞陶天下之士其
因伏念去就離合於榮瘁廢興之際先君若無負而其
存沒死生可感可念者妄意鈞坐或以動心先君素不
治產薄田之入不足以餬口兄弟三人奉家法惟謹今

尚同居解官合食即有不足之嘆兄長某某官非久替
罷舍弟某某官尚待遠次某備負某官再書考薦者幸
如格更一考可以闕陞而代者迫之去銓部難得闕求
一苟祿地未知所向唯廟堂特達陶鑄一闕乃可贖食
而療饑地寒人微無以自謀伏自惟念非鈞坐惠顧求
疇昔錄先君去就離合之際不苟於門下若此而其存
沒死生誠若可念特以丘山大惠重卹其不肖之孤假
一字之寵於廟堂庶幾得合八一近闕以濟旦暮之急

則集迫切之懇尚何所赴雖然此救焚溺之計也至於
願展薄伎仰備使令則日夕企望鈞坐歸踐冢司當亟
叩黃閣以干識察凡先君之所以欲報鈞坐而未果者
將盡效焉蟻蠅之軀不敢愛也所業一篇非所以學姑
藉手以干是正脚色闕目併塵小史之聽伏幸采覽